

Kremtohet Shën Asti, martiri i shek. I dhe mbrojtësi i qytetit të Durrësit



Në kishën kryesore të qytetit të Durrësit, Apostull Pavli dhe Shën Asti, u kremtua me gëzim festa e Shën Astit, Episkopit të parë martir dhe mbrojtësit të qytetit.

Kremtimi i kësaj dite mori një rëndësi të veçantë pasi Shërbesat e Shenjta, Mëngjesorja dhe Liturgjia Hyjnore, u drejtuan nga Fortlumturia e Tij, Kryepiskopi Joan, në bashkëmëshim me Hirësinë e Tij, Episkopin e Amantias z. Ignat, si edhe me klerikë nga Durrësi dhe Tirana.

Në fjalën e Tij, Kryepiskopi Joan foli për jetën dhe shembullin e Shën Astit, duke theksuar se martirët janë themeli mbi të cilin u ngrit Kisha. Ai u kujtoi besimtarëve se gjaku i tyre u bë fara e përhapjes së Krishterimit në mbarë Perandorinë Romake dhe se qëndresa e tyre përballë përndjekjeve dëshmoi fuqinë e besimit në Krishtin.

Duke folur për jetën e Shën Astit, Kryepiskopi Joan u kujtoi besimtarëve se Episkopi i Durrësit, sipas traditës, luajti një rol vendimtar në përhapjen e Ungjillit në trevat Ilire.

I paralajmëruar në mënyrë profetike për martirizimin e tij, ai nuk u largua, por zgjodhi të qëndronte pranë grigjës së tij, duke dëshmuar besnikërinë ndaj Krishtit

deri në frymën e fundit.

Kryepiskopi Joan përshkroi torturat çnjerëzore që iu nënshtrua shenjtë, i cili, pasi refuzoi të mohonte besimin dhe të adhuronte hyjnitë pagane, u kryqëzua dhe u la të vuante nën diellin përvëlues të korrikut, me trupin e lyer me mjaltë, derisa dha shpirt. Sakrifika e tij u bë frymëzim edhe për të krishterët e tjerë, të cilët më pas u martirizuan në ujërat e Adriatikut, duke vulosur me gjakun e tyre besimin në Krishtin.

Fortlumtura e Tij, Kryepiskopi Joan theksoi se Kisha nuk i nderon martirët thjesht si heronj të historisë, por si dëshmitarë të Ngjalljes së Krishtit. Sipas Tij, gëzimi i festave të martirëve buron nga fitorja e jetës mbi vdekjen dhe nga shpresa e përhershme që ata dëshmuar me sakrificën e tyre.

Kryepiskopi Joan u ndal veçanërisht te kuptimi i martirizimit në jetën e çdo të krishteri, duke theksuar se sot dëshmia nuk kërkon domosdoshmërisht derdhjen e gjakut, por një jetë të jetuar sipas Ungjillit.

Sa herë që njeriu kryqëzon pasionet, gënjeshtren, shpifjen, zilinë, urrejtjen dhe egoizmin, ai bëhet pjesëmarrës në një martirizim shpirtëror, duke lënë pas njeriun e vjetër për të lindur njeriun e ri në Krishtin, u shpreh Kryepiskopi.

Ai kujtoi gjithashtu se të krishterët nuk dëshmojnë vetëm me fjalë, por mbi të gjitha me jetën e tyre, duke vënë në dukje se predikimi më i fuqishëm është shembulli personal.

Në përfundim të predikimit, Fortlumtura e Tij, Kryepiskopi Joan ftoi besimtarët t'i luten Shën Astit që të ndërmjetojë pranë Perëndisë për paqe, dritë dhe bekim mbi Kishën, qytetin e Durrësit dhe mbarë vendin.

Pas Liturgjisë Hyjnore u zhvillua litania me ikonën e Shën Astit rreth kishës, kryesuar nga Kryepiskopi Joan, ndërsa Kori i Katedrales "Ngjallja e Krishtit" në Tiranë në drejtimin e z. Theodhor Peci, shoqëruan me lutje dhe himne.

Në mbyllje të kremtimit, At Gjerasimi, në emër të klerit dhe besimtarëve, falënderoi Kryepiskopin Joan për praninë e Tij, duke theksuar se pjesëmarrja e Tij i dha një gëzim të veçantë festës së shenjtë mbrojtësit të Durrësit.

Një surprizë shumë e bukur nga Kryepiskopi Joan, u bë ndaj At Asti Beshirit, prifti i Kishës së Apostull Pavlit në Rrushkull, i cili, në ditën e emrit të tij, mori nga duart e Kryepiskopit Joan ofiqin e Saqellar Stavroforit, si shenjë vlerësimi për shërbimin dhe përkushtimin e tij në Kishë.

Më pas, Kryepiskopi Joan kaloi kohë me klerikët dhe besimtarët, duke ndarë me ta gëzimin e kësaj dite të bekuar.

[Radio "Ngjallja"](#)